

Contu pigau de “Po Cantu Biddanoa” de Benvenuto Lobina.

Lioni, su cani de su bandidori sciancau

Primu parti

Debolezza, su bandidori sciancau, teniat unu cani, unu bellu cani colori 'e meli, mannu che unu vitellu, di arrazza fonnesa, naràt su meri, attriviù, capassu de firmari unu malloru arrù, naràt su meri, si dd'èssit beniu a trettu. Pariat unu lioni, no unu cani, po cussu dd'iat postu Lioni.

Una bella dì de donniassantu, Debolezza e Lioni fùant andaus a circai cardolinu, facci a Is Taccus. A bell'a bellu Debolezza, cun su bàculu e una bertuledda a coddu, currendu ananti e infattu Lioni, firmendusi fattu-vattu a fragai una perda o a arziai sa cambia in d'un'àtara, prexau comente chi fèssit andendu a festa. Mischinu.

Arribaus a Is Taccus, mentris Debolezza fut girendu passu passu, circhendu a conca bàscia in d'unu paris accantu creiat chi ddu èssit cardolinu pezza, de palas de una màccia 'e moddizzi 'ndi stùppat to' in d'una unu malloru nieddu. Arrù. Comenti bit a Lioni, su malloru, sulendu che una pibera, s'inci ddi scùdit asuba a conca bàscia, sciamiendu is corrus accuzzus, circhendu de ddu ferri a morti cun d'unu scàviu infattu 'e s'àturu. Ma Lioni no est unu cani 'e bértula, e si ddi furriat a dentis in foras murrungendu, zaulendu a curzu a curzu, airàu, mussiendiddu cun feli accantu pòdit, a su zugu, a su pitturrari, a su fundu 'e s'origa. Su malloru però no si firmat s'indi scùtulat su cani e camminat, iscàviat e camminat, passu passu, finzas a chi ci portat a Lioni accanta 'e unu spèrrumu. Po unu pagheddu su certu sìghit inguni, cun su malloru chi cun is corrus di azzàrgiu bòlit donai a su cani s'ürtimu corpu, su corpu chi pòngat fini a su certu, ma su cani no tènit gana 'e s'arrendi, est abettiosu e attriviù, si mòvit che un'anguidda, si cràvat a su malloru che unu dimóniu, peseñdusindi 'e terra e murrungendu, cun sa baulada in bucca, su pilu azzuzzudau, mussiendu cun feli accantu arrennèscit a arribai. Ma senza 'e s'ind'acatai, torrendu aseguis comenti camminat su malloru, Lioni è lómpiu a s'òru 'e su spèrrumu. S'ind'acàtat su malloru, però, chi abascendu lésturu sa conca arrennèscit a ddi ponni to' a is dus corrus asutta 'e brenti, e pèsat a bolai su cani. Lioni furriottat in s'àiri, e cun d'unu zàulu disisperau ci arrùit in su spèrrumu. Tandu su malloru àrziat prus in artu sa conca, superbu, si fùrriat, marrascèddat, pèsat unu corrinu e s'inc'istésiat a passu adasiau, cun s'àiri 'e su bincidori.

Debolezza, firmu, cun su bàculu in d'una manu e unu cardolinu in s'àtara, at bistu totu ma no at pòziu fai nudda. At provau a zerriai a Lioni, ma su cani no ddu pòdit intendi. Candu dd'at bistu arruendinci in su spèrrumu, Debolezza ci at fuliau su cardolinu, e cun su bàculu e su passu chi ddi permettint is cambas pagu seguras, a pampadas, arrumbulendu in sa calàda prena 'e spina, acùdit accantu pènzat chi pòzat èssi arrutu su cani. Intèdit unu zùnchinu e bit a Lioni: c'est arrutu in pizzus de unu muntoni 'e perda e de spina, ddi béssit sànguni de bucca e di origas, ma candu Debolezza ddi pònit sa manu in conca sénzat de zunchiai. Pàrit mortu. Però connòscit sa manu 'e su mèri, sa boxi, cumprèndit is fueddus, e apustis de unu pagheddu mòvit appenas sa coa.

Oras passanta, cun Debolezza carinniendu su cani mesu mortu comente chi dd'èssit pòziu donai vida cun sa manu amorosa.